

भाई जीते जी त सड़या र खाट में,
इब मरया नहवायें के होगा,
और टेम प रोटी देयी ना खाण ने,
यो गाम जयमायें के होगा ॥

सुबह शाम तन्नै एक घड़ी भी,
पैर भी दबाए ना,
कड़वा बोल सदा तुं बोलया,
सुख के टुक खवाए ना,
इब धर क फोटु आगः र भाईयो,
फुल चढ़ाएं के होगा,
टेम प रोटी देयी ना खाण ने,
यो गाम जयमायें के होगा ॥

टुटे लितर मैले कपड़ै,
कदे धोणे का काम नहीं,
टुटी खाट प पाटया गुदड़ा,
जिप सोणे का काम नहीं,
आज बणा समाधी खेतां के महां,
यो चीर उढ़ाएं के होगा,
और टेम प रोटी देयी ना खाण ने,
यो गाम जयमायें के होगा ॥

मात पिता का बदला र भाईयो,

किसे जन्म ना तारया जा,
करता दगा जो इनके संग में,
वो बिन आई में मारया जा,
आज कर क याद पाछली बातां ने,
यो नीर भहायें के होगा,
टेम प रोटी देयी ना खाण ने,
यो गाम जयमायें के होगा ॥

हरियाणे के जिले रोहतक में,
इसा मिलणा गाम समाल नहीं,
गुरू रामसिंह धोरः रहता,
कप्तान शर्मा काल नहीं,
हर का गाणा गाया ना कदे,
यो मुंह बांए त के होगा,
और टेम प रोटी देयी ना खाण ने,
यो गाम जयमायें के होगा ॥

भाई जीते जी त सड़या र खाट में,
इब मरया नहवायें के होगा,
और टेम प रोटी देयी ना खाण ने,
यो गाम जयमायें के होगा ॥

गायक – नरेन्द्र कौशिक ।
भजन प्रेषक – राकेश कुमार जी,
खरक जाटान(रोहतक)
(9992976579)



Bharat Temples

Complete Bhajans Collections - Download Free Android App

<https://play.google.com/store/apps/details?id=com.numetive.bhajans>

Facebook: <https://www.facebook.com/bharattemples/>

Telegram: <https://t.me/bharattemples>

Youtube: <https://www.youtube.com/channel/UC24oJCxZjyhhKzSUD-Lt9Tw>